

**■ COLUMNA**

# «Or da nossas ideas sorta in bun project»

DAD AITA DERMONT-STUPAN

**P**utgà che be paucs Engiadinais han gi la schanza da leger l'interessanta intervista da *Claudia Cadruvi* cun il president da la Lia Rumantscha *Johannes Flury* en La Quotidiana dals 18 da matg. Sezs la culpa, ils Engiadinais, sch'els n'han betg abunà LQ.

**M**o uschè simpel n'èsi betg. Ils Engiadinais han la «Posta Ladina». L'UdG ha confermà ch'els sustegnan tuttas soluziuns, basta ch'els hajan lur «Posta Ladina».

**P**erò er Johannes Flury di: «La 'Posta Ladina' impedescha che La Quotidiana tschiffa ragisch en l'Engiadina. Co pon ins sa tegnair vi da la 'Posta Ladina' ed anc sustegnair ina gassetta surregiunala? Quai han ins ussa vesì ch'i na funcziuna betg. Tgi abunescha duas differentas gasettas che portan per part las medemas contribuziuns? En Surmeir n'èsi betg bler auter.»

**B**e ils Sur- e Sutsilvans cumbattan per La



Quotidiana, gassetta dal di surregiunala. Èn els ils unics che s'interessan per tut las regiuns rumantschas? Jau dubit. Sch'els avessan numnadamain er la letga/schelta tranter ina gassetta silvana che cumpara trais giadas l'emna u La Quotidiana pon ins circa s'imaginar tgenina ch'i abunessan. «Ins na po gnanca zic discurre d'ina unitad rumantscha», constatescha Johannes Flury. «In'unitad rumantscha n'hai mai dà», di Claudia Cadruvi.

**B**etg da crair! Ed jau hai anc adina la visiun ch'ìls Rumantschs da tut las regiuns s'interessian finalmain in per l'auter, sviluppiant ina ferma conscienza rumantscha e daventian tuts commembers da la Lia Rumantscha.

**L**a Lia Rumantscha è liada vi da sias uniuns affliadas», di Johannes Flury. E quellas blocheschan il svilup da la Rumantschia e dal rumantsch gia dapi bunamain in mez tschientaner (quai di jau, atenziun a las parantesas). Jau propon d'abolir las uniuns affliadas!

**P**render sut la marella tut las medias rumantschas e tschertgar soluziuns cun Radiotelevisiun Svizra Rumantscha ma para ina schanza. RTR è respectà en tut la Rumantschia. Jau vom d'accord cun Johannes Flury che vul tschertgar autras vias! I na gida nagut da vulair salvar insatge che funcziuna be per part u na funcziuna betg pli.

**L**a Quotidiana tutga a la Somedia e la 'Posta Ladina' a Gammeter.» (Flury/Cadruvi) Questa dependenza e squitsch da las chasas edituras ma disturba gia da ditg. «Nus stuain contractar intensivamain cun las duas chasas edituras... Or da nossas ideas sorta in bun project», di Johannes Flury.

**J**au crai vidlonder.